

PENYELEWENGAN SYIAH

PENGENALAN

Perbezaan pendapat di kalangan umat Islam dalam bidang syariah atau perundangan Islam dianggap satu rahmat kerana di sebalik perselisihan pendapat ini telah membawa kepada pertemuan, perbincangan dan perbahasan di antara alim ulama yang pakar dalam bidang tersebut sehingga satu keputusan dapat dibuat.

Walau bagaimanapun perbezaan pendapat dalam bidang politik dan akidah lebih cenderung kepada malapetaka serta peperangan saudara umat Islam. Ia mengakibatkan perpecahan di kalangan umat Islam yang tidak diinginkan oleh Rasulullah S.A.W dan seluruh umat Islam. Demikianlah kewujudan fahaman Syiah telah menimbulkan perpecahan di kalangan umat Islam.

LATAR BELAKANG SYIAH

Syiah Imam Dua Belas (*Ja'fariyah*)

Kumpulan ini merupakan golongan Syiah yang terbesar di Iran dan merangkumi hampir 60% daripada penduduk Iraq. Golongan ini juga menjadi kumpulan minoriti di beberapa buah negara seperti Pakistan, Afghanistan, Lebanon dan Syria.

Syiah Zaidiyah

Kumpulan yang dikenali dengan nama Syiah Imam Lima dan ia berkembang di Yaman dan hampir 40% daripada penduduk negara tersebut adalah pengikut Syiah Zaidiyah.

Syiah Ismailiyah

Kumpulan ini mempunyai Imam Tujuh dan pengikutnya dianggarkan seramai 2 juta orang. Kumpulan ini sekarang berpusat di India dan bertaburan di sekitar Asia Tengah, Iran, Syria dan Timur Afrika.

FAKTOR-FAKTOR KEMUNCULAN FAHAMAN SYIAH

1. KEWAFATAN RASULULLAH S.A.W

Terdapat sesetengah pihak yang berpendapat bahawa Saidina Ali lebih berhak menjadi imam lalu berpihak kepadanya. Pendapat ini juga dipegang oleh sebahagian puak Syiah dengan penafsiran khas mereka sendiri. Sementara selain Syiah pula mengkaitkan pendapat ini dengan pandangan yang mengatakan bahawa talian darah dengan Rasulullah S.A.W lebih berhak menjadi khalifah selepas Rasulullah S.A.W.

2. KEMUNCULAN PERGERAKAN ABDULLAH B. SABA' DI PENGHUJUNG ZAMAN UTHMAN R.A.

Abdullah b. Saba' adalah seorang Yahudi dari Yaman dan pengasas golongan Syiah Al-Sabaiyah yang merupakan golongan Syiah pelampau. Dia telah memeluk Islam pada zaman Uthman r.a, dan menjelajah ke kota-kota Islam dalam percubaannya untuk menyesatkan umat Islam.

3. PEPERANGAN SIFFIN DAN MAJLIS TAHKIM

Reaksi kepada puak Khawarij yang menentang Saidina Ali r.a dalam peristiwa Tahkim. Mereka melaungkan bahawa imam itu adalah hak umum bagi semua kaum muslimin tanpa wujud keutamaan antara orang Arab dengan bukan Arab, dan antara bangsa Parsi atau Habsyah. Puak Syiah dalam keadaan itu menjadikan imam hak di kalangan ahli bait Rasulullah S.A.W sahaja, dari keturunan Saidina Ali r.a.

4. PEMBUNUHAN HUSSEIN R.A.

Selepas peristiwa menyayat hati ini, lafaz Syiah mula digunakan untuk merujuk kepada mereka yang menyokong Saidina Ali r.a dan keturunannya.

Kesimpulan : Sebahagian prinsip akidah bagi Syiah telah lahir pada tangan Abdullah b. Saba', tetapi tidak timbul secara berkumpulan. Hanya selepas berlaku peristiwa di atas, terutama selepas pembunuhan Hussein, Syiah mula muncul sebagai suatu kumpulan yang berkembang berdasarkan prinsip-prinsip tertentu yang dilontarkan oleh Ibnu Saba' di dalam suasana pemikiran bagi puak Syiah ketika itu.

SYIAH DI MALAYSIA

Syiah di Malaysia merupakan satu kelompok pecahan dari umat Islam yang merangkumi lebih kurang 10% dari seluruh umat Islam di dunia. Di Malaysia terdapat 3 kumpulan Syiah yang berkembang semenjak beberapa tahun yang lalu iaitu :

Syiah Taiyibi Bohra (Dawood Bohra)

Kumpulan ini berasal dari India dan di Malaysia ia dikenali dengan golongan yang memiliki **Kedai Bombay**. Kumpulan yang berpusat di daerah Kelang ini mempunyai tanah perkuburan dan masjidnya sendiri dan pengikutnya dianggarkan seramai 200 hingga 400 orang.

Syiah Ismailiyah Agha Khan

Kumpulan yang dikenali dengan nama *Kedai Peerbhai* ini bergerak di sekitar Lembah Kelang. Jumlah pengikut tidak diketahui tetapi bilangannya lebih kecil dari kelompok Bohra.

Syiah Ja'fariyah @ Imamah Ithna Assyariyyah. (Imam Dua Belas)

Kumpulan Syiah ini dipercayai mula bertapak di Malaysia selepas kejayaan Revolusi Iran pada tahun 1979. Pengaruh ajaran dan fahaman kumpulan ini menular ke negara ini melalui bahan-bahan bacaan dan orang perseorangan samaada yang berkunjung ke Iran atau yang datang dari Iran.

Fahaman Syiah ini bertambah meruncing apabila beberapa orang Pensyarah universiti tempatan telah memainkan peranan untuk menyebarkan fahaman Syiah Ja'fariyah secara serius kepada para pelajar di Institut Pengajian Tinggi.

PENYELEWENGAN FAHAMAN SYIAH

1. PENYELEWENGAN DARI SUDUT AKIDAH

- Khalifah diwasiatkan secara Nas.
- Imam adalah maksum.
- Ilmu Allah berubah-ubah mengikut sesuatu peristiwa yang berlaku kepada manusia.
- Kemunculan semula Imam Mahdi dan kumpulan orang yang telah mati untuk memberi keadilan.
- Berpura-pura iaitu menyatakan dengan lisan yang menyalahi hati kerana takut kemudharatan diri walaupun yang disembunyikan itu perkara yang benar.
- Konsep al-Mahdiah iaitu kepercayaan kepada Muhammad bin Hassan al-Askari sebagai imam Mahdi al-Muntazar.
- Penyanjungan yang keterlaluan kepada Sayidina Ali.
- Mengkafirkan para sahabat Rasulullah S.A.W.
- Menuduh Abu Bakar, Umar, Uthman dan Muawiyah sebagai empat berhala Quraisy serta pengikut-pengikut mereka adalah musuh Allah.
- Hanya Ali dan para Imam sahaja yang menghafal dan menghimpun al-Quran dengan sempurna.
- Menghalalkan nikah mut'ah.

- Menambah nama Saidina Ali dalam Syahadah.
- Menolak Hadis yang diriwayatkan oleh Ahlu Sunnah Wal Jamaah sekalipun Hadis Mutawatir.

2. PENYELEWENGAN DARI SUDUT SYARIAT

- Menolak Ijmak Ulama.
- Menolak Qias.
- Mengamalkan nikah mut'ah

3. PELBAGAI PENYELEWENGAN UMUM

- Menziarahi kubur Saidina Hussein, ganjarannya syurga.
- Menyiksa tubuh badan sempena 10 Muharram bagi menangi kematian Saidina Hussein.
- Menghina isteri-isteri nabi S.A.W.
- Mengharuskan jamak sembahyang dalam semua keadaan tanpa sebarang sebab.
- Imamah dan Khalifah sebahagian daripada rukun Islam dan ianya berlaku melalui nas.
- Sembahyang dhuha adalah bid'ah
- Islam bukanlah syarat wajib Haji.
- Wajib menyapu kedua-dua kaki dan tidak memadai hanya dengan membasuh kedua-duanya.

PERBEZAAN DI ANTARA SYIAH DAN SUNNAH

BIL	SYIAH	SUNNAH
1.	<p>Akidah</p> <ul style="list-style-type: none"> * Mengenal Allah wajib dengan akal * Melihat Allah itu tidak harus dan mustahil samaada di dunia atau di akhirat. * Sifat Allah itu ialah zatNya. 	<ul style="list-style-type: none"> * Mengenal Allah wajib dengan syarak (Allah lah yang mewajibkan manusia mengenalnya). * Melihat Allah adalah harus di dunia dan di akhirat. Sesetengah berpendapat harus di akhirat sahaja. * Sifat Allah itu bukan zatNya.
2.	<p>Kebangkitan nabi-nabi dan terpelihara mereka dari salah dan silap</p> <ul style="list-style-type: none"> * Wajib Allah bangkitkan Nabi-nabi kerana ia menghampirkan manusia kepada Allah dan menjauhkan dari maksiat. * Nabi-nabi terpelihara daripada dosa besar atau kecil. 	<ul style="list-style-type: none"> * Tidak wajib ke atas Allah membangkitkan Nabi-nabi untuk menerangkan kepada manusia sumber kebaikan dan keburukan. * Dosa-dosa kecil harus dilakukan oleh Nabi-nabi samaada sengaja atau terlupa. Dosa besar pula berkemungkinan dilakukan dengan cara terlupa atau tidak disengajakan.
3.	<p>Khalifah</p> <ul style="list-style-type: none"> * Khalifah ditentukan dengan nas Nabi-nabi atau Imam yang terpelihara dari dosa. * Khalifah dan Imam dikehendaki terpelihara dari dosa. 	<ul style="list-style-type: none"> * Khalifah ditentukan dengan pemilihan dan sudah mencukupi ikrar taat setia dibuat walaupun oleh seorang sahaja. * Terpelihara dari dosa bukanlah syarat untuk menjadi Khalifah.

KITAB UTAMA

AWAS! Terdapat beberapa kitab utama Syiah yang telah dijadikan bahan rujukan, antaranya:

1. **Al-Sahabah**, oleh: Haidar
2. **Ahlu al-Bait**, oleh: Dr. Mahfuz Mohamed
3. **Minhaj Kebenaran dan Pendedahannya (Fiqh Lima Mazhab di antara Nas dan Ijtihad)** oleh: Al-Hasan bin Yusuf al-Mutahhar.
4. **Kasyf al-Asrar**, oleh : Ayatullah al-Khomeini
5. **Al-Hukumah al-Islamiah**, oleh: Ayatullah al-Khomeini
6. **Al-Sab'ah Min al-Salaf**, oleh: Ayatullah al-Murtadza az-Zubaidi
7. **Tahrir al-Wasilah**, oleh: Ayatullah al-Khomeini
8. **Al-Muraja'at**, oleh: Al-Sheikh Abdul Husin Syarafuddin al-Musawi
9. **Al-Usul Min al-Kafi**, oleh: Al-Sheikh Abdul Husin Syarafuddin al-Musawi
10. **Peshawar Nights**, oleh: Al-Sayyid Muhammad Rais al-Wahidin
11. **Mengapa Aku Memilih Ahlul Bait a.s?**, oleh: Syeikh Muhammad Mar'i al-Amin al-Antaki – diterjemah oleh Prof. Madya Dr. Lutfi Ibrahim (thn 1993).
12. **Mafatih al-Jinan**, oleh: Sheikh Abbas al-Qummi